

Parit sebu punca banjir



Derman menunjukkan paras air ketika rumahnya dilanda banjir pada Aidilfitri lalu.

SUNGAI TENGI KANAN DARAT - Sistem saliran kurang sempurna memberi masalah kepada penduduk di Jalan Ros, di sini, apabila kawasan rumah mereka kerap ditenggelami air setiap kali hujan lebat.

Pengadu, Derman Parlan, 60, berkata, masalah menjadi lebih teruk ketika sambutan Aidilfitri sebulan lalu, apabila rumahnya ditenggelami air sehingga menjejaskan persiapan raya.

Menurutnya, air setinggi 0.1 meter itu memenuhi ruang halaman rumah dan memasuki kawasan dalam rumah sehingga menimbulkan rungutan keluarganya.

"Sambutan raya tahun ini tidak meriah, paling sedih saudara mara yang datang jauh tak dapat masuk rumah beraya.

"Bukan depan rumah je banjir, dalam

rumah pun sama. Memang tak sangka jadi macam ni. Jiran pun terpaksa hadap masalah sama, lagi tanaman kontan dia rosak sebab banjir," katanya.

Derman berharap, pihak berwajib dapat memantau dan menyelenggarakan parit yang difahamkan lebih lima tahun tidak didalamkan dan sebu dengan rumpai.

Isu sama turut dibangkitkan Kelab Sukan dan Kebajikan Penduduk Sungai Tengi Kanan Darat Tanjong Karang (Kesak) yang memohon pihak berwajib memandang serius masalah itu.

Pengerusinya, Arbaie Sahlan berkata, pihaknya memohon jasa baik jabatan berkaitan mengatasi masalah itu.

"Kalau boleh, masalah parit ni dapat diberi perhatian segera," katanya.